

08. november

UKA2018/165

Nuna tamakkerlugu kulturikkut kingornussarsiat suussusiinik aalajangersaasussanik UPA2019-mut suleqatigiissitaliornissaannik kulturikkullu kingornussarsiat kingusinnerpamik 2021-mi saqqummiutassat Naalakkersuisut peqquneqarnissaannik Inatsisartut aalajangiiffigisassaattut siunnersuut.

Inatsisartunut ilaasortaq Mimi Karlsen, Inuit Ataqatigiit aalajangiiffigisassatut siunnersuutaanut qujavugut. Siumut sinnerlugu imak oqaaseqarfigissavarput.

Inuiattut kinaassuserput tullussimaarutissarpasuaqarfigaarput. Ileqqut ukiorpassuarni inuiaat akornatsinni pigisagut suli amerlaqaat. Inuiaqatigiuvugut ikittunnguit taamaattoq ilisarnaatigaagut ikiuukkumatunerput anersaakkullu pisoorsuunerput. Tanngassimaarutissagut nuannersut saqqumilaartittarpagut tigussaasutigut tigussaannngitsutigullu.

Siumut isumaqarpoq kulturitsinni pingaartitagut annertuut assersuutigalugu oqaatsigut suli maannamut nukittuumik inissisimasut. Qujanarpoq meeqqat atuarfianni kalaallit oqaasiisa pingaartinneqarlutik aallunneqartuarnerat. Atuakkallu meeqqanut inersimasunullu nutaaliornikkut saqqummertartut nuannaarutissaraagut naak teknologi sukkasuumik siuariartoraluartoq taamaattoq katataajartorneq qujanartumik piunngilaq, matumani tamatta akisussaaqatigiilluta tamanna pisussaaffigaarput.

Inuiaqatigiittut pingaartitagut eriagisassatullu pigisagut tammatsaaliorneqarnerat katersugaasiveqarnikkut suli pigaagut. Katersugaasivugut atorluartariaqarpagut inuiattut siuaasattalu kikkuunerannik oqaluttuuartuusut tassuunatigut uummarissarneqartuarmata. Katersugaasivitta atorluarnerunissaat Siumumiit sakkortuumik kaammattuutigaarput. Taamaasilluta pisuussutigut tigussaasut saqqumilaartinneqartuarnissaat qulakkeersimasimasinnaagatsigu. Nunat allat sanilerisagut qiviaraanni Island Savalimmiullu namminerisamik kulturimut tunngasumik suleqatigiisitaliornikuunngillat. Katersugaasiviilli atirluarneqarnerisigut inerisaaneq siammartinneqarsimapput. Tamanna isumaq malitassaavoq ilinniarfiullunilu. Siumut isumaqarpoq qallunaat nunaanni periuutsit ilaannngikkaluarlugit taamaattoq suleqatigiinneq akimorlugu aaqqissuussinissaq pilerinarnerusoq. Isumaqarpugummi eqqumiitsuliortut, isiginnaartitsisartut, erinarsortartullu maannakkut peqatigiiffeqarnerat nukittuumik ingerlasoq suli atorluarneqarnerusariaqartoq.

Kommunet ataanni susassaqarfinni kiffaannngissuseqarput kulturimut tunngasunik immikkut suleqatigiissitaliorsinnaallutik, tamanna piunngissuseqarfigineqassappat isumaqarpugut periarfissaq tamanna kommunet iluminni aalajangersinnaassagaat. Kulturilerinerullu ataani sulianut assigiinngittunut tunngatillugu takornarialerisut nunaqavissunut atorluaasinnaapput kulturitsinnut annertusaanernut atatillugu aaqqissuussinissaminut.

Meeqqat atuarfianni inuiaqatigiilerinerup atuartsissutaanerani inerisaavik atorluarneqarsinnaanera periarfissaavoq kulturikkut pingaartitagut annertusarnissaannik atorluassallugu. Maannalu isiginnaagassiorarneq paasititsiniaanikkullu saqqummiussisarnerit ineriartorfianni atorluaasinnaaneq simmasillunilu annertoqaaq. Taamaattumik pigeriikkavut atorluarunissaat Siumumiit innersuuppagut, siunnersuullu taamak isikkoqartillugu itigartipparput.

Laura Táunâjik, Siumut